



PROPOSICIÓN SOBRE A AMPLIACIÓN DO ABASTECIMENTO E SANEAMENTO E OUTRAS MELLORAS NA PARROQUIA DE BANDO

O **Grupo Municipal do Partido Popular**, ao abeiro do Regulamento Orgánico Municipal, presenta, para a súa inclusión no Pleno, a seguinte **PROPOSICIÓN**:

EXPOSICIÓN DE MOTIVOS

A parroquia de Bando situada na zona norte do Concello conta con sete entidades singulares de poboación na que residen 960 habitantes (IGE, 2016). Nos 8,34 kms do seu territorio radican un bo número de empresas e entidades -entre elas os complexos informativos da RTVG e da TVE- e por ela discorre a antiga estrada N-634 e a autovía A-54 que enlaza con Lugo, así como o tramo final do Camiño Francés ata o Monte de Gozo, a partir de onde se adentra na parroquia de San Lázaro.

Nunha xuntanza mantida no pasado mes de outubro con representantes veciñais nesta parroquia recolleemos unha serie de demandas que, pola súa transcendencia e posibilidade de seren asumidas na acción municipal incluímos nesta iniciativa.

En primeiro lugar, coincidindo coa prioridade sinalada pola propia veciñanza, propoñemos a ampliación do servizo de saneamento e abastecemento, servizos básicos que desde hai anos chegan a varios puntos da parroquia –principalmente ao longo do trazado da estrada principal que conecta con Lavacolla- pero do que carecen moitas vivendas sobre todo as situadas na zona norte da parroquia. Polo súa importancia ambiental, e tendo en conta a densidade de actividades empresariais que se rexistran nesta zona, sería conveniente trazar unha planificación global que permitira ir estendendo de forma gradual estes servizos con criterios obxectivos de prioridade para facilitar a súa execución, dispoñendo así dun documento que facilitara a negociación con outras instancias (Deputación e Xunta de Galicia) para facer fronte ao financiamento.

Unha segunda actuación sobre a que chaman a atención os veciños fai referencia á vía de enlace entre San Marcos e a autovía A-54 que coincide coa rúa do Castro. Trátase dunha vía local moi estreita e sen beiravías, na que escasamente se poden cruzar dous turismos, a pesar de ter un tránsito habitual moi elevado, á marxe da gran intensidade das últimas semanas motivada polo corte da N-634 na ponte sobre a AP-9 en San Lázaro. A ampliación da plataforma para facilitar a mobilidade de vehículos e peóns non debería supoñer un gran esforzo económico, se temos en conta que se trata dun treito de pouco máis de 400 metros que xa conta na actualidade cunha franxa de terreo susceptible de ser aproveitada para este fin. Acadaríase así unha notable mellora nesta importante conexión entre a estrada N-634 de acceso a Lavacolla e autovía A-54 Santiago-Lugo, que a pesar de presentar un firme en bo estado sen dúbida precisa esta ampliación.

Outra actuación viaria que reclama a veciñanza da parroquia é o alargo do acceso ao lugar de Pousada, que presenta dificultades para o tránsito do autobús urbano debido á súa estreiteza, especialmente nun tramo concreto no que non é posible o cruzamento de dous vehículos.



Por último sinálase a necesidade de dotar á parroquia dun parque infantil e doutro biosaudable, que poderían ser radicados no contorno do centro sociocultural da parroquia no Coto dos Olmos. Como complemento desta dotación debería contemplarse tamén a posibilidade de habilitar unha senda pola beiravía desde a antiga estrada N-634 que mellorase a seguridade e facilitase a conexión co centro sociocultural, un traxecto de pouco máis de 400 metros que nunha parte do seu tramo final coincide co trazado do Camiño Francés.

Á vista do exposto, o Grupo Municipal presenta para a consideración da Corporación a adopción do seguinte

ACORDO

O Pleno insta ao correspondente órgano do Goberno Municipal a que planifique e execute de forma sucesiva, conforme ás posibilidades orzamentarias, as seguintes actuacións no ámbito da parroquia de Bando:

- 1. A redacción dun proxecto de ampliación do saneamento e abastecemento na zona norte de Bando, naqueles lugares que carezan destes servizos básicos, marcando unha priorización que permita desenvolver a súa execución por fases a partir do vindeiro ano 2018.***
- 2. A redacción dun proxecto para a ampliación e mellora da plataforma da rúa do Castro que serve de enlace entre a antiga N-634 e a autovía A-54 Santiago-Lugo, para afrontar a súa construción, xestionando a participación económica doutras administracións.***
- 3. O estudo para a mellora das condicións do acceso ao lugar de Pousada, que facilite o tránsito dos autobuses e, en xeral, a mobilidade da veciñanza.***
- 4. A incorporación á planificación en materia de equipamentos sociais dun parque infantil e dun parque biosaudable, contemplando a posibilidade da súa instalación no contorno do centro sociocultural da parroquia.***

Santiago de Compostela, a 31 de outubro de 2017


Agustín Hernández
Portavoz do Grupo Municipal Popular